

# **REGULAMENTO INTERNO DA EMISORA DE RADIO MUNICIPAL DE VAL DO DUBRA**

## TITULO PREELIMINAR.

A emisora municipal de radio Val do Dubra é creada polo Concello, co obxectivo de fomentar a información e participación dos veciños en todos os problemas que afecten ao municipio.

O Consello desta emisora municipal ten carácter consultivo, configurándose como órgano básico de participación veciñal no relativo ás decisións que, nesta materia, lle corresponda á Corporación municipal.

A emisora municipal garantirá unha información obxectiva e pluralista, así como a participación de calquera forza política ou asociación social ou económica, e persoas individuais, non podendo discriminar a ninguén pola súa ideoloxía ou crenzas relixiosas.

A liberdade de expresión, o acceso a todos os sectores sociais e forzas políticas, a igualdade de oportunidades á hora de expoñer as diversas posicións e o pluralismo informativo constituirán os eixes básicos da súa programación.

A concepción da radio como medio vivo e participativo, dinamizador da vida do Concello e capaz de achegar o labor municipal aos veciños, así como a conciencia do importante papel que ten xogar no intre de fomentar a nosa cultura, son cuestións fundamentais que animan o nacemento da Emisora de Radio Municipal.

O idioma oficial da emisora é o galego, sen prexuízo do recoñecemento dos dereitos lingüísticos individuais das persoas ou entidades ás que se lles solicita a súa colaboración ocasional ou ás que se invite a participar nos diferentes programas.

A Emisora Municipal de Radio Val do Dubra caracterízase polas cualidades que se sinalan a continuación:

- Ser un medio de comunicación de titularidade pública.
- Configurarse como un servizo público, con fins socio-culturais e de interese para a colectividade local.
- Constituírse como un medio de comunicación institucional, nacido para propiciar novas canles de información entre administradores e administrados.
- Trátase dun medio de comunicación local, tanto no referente ó seu ámbito de emisión como ós contidos da súa programación, prestando especial atención á comunidade que o sustenta.
- Promocionar e protexer a lingua galega.
- Garantir a obxetividade, veracidade e imparcialidade das informacións.
- Separar entre informacións e opinións, identificando sempre a quen lle comuniquen estas últimas e a súa libre expresión, cos límites que marca o apartado 4 do artigo 20 da Constitución Española.
- Respetar o pluralismo político, relixioso, social, cultural e lingüístico.
- Protexer a xuventude e infancia, excluindo a exaltación da violencia e a apoloxía dos feitos e condutas atentatorias contra a vida, a liberdade e a igualdade entre homes e mulleres.

## TITULO I. OBXECTO, NATUREZA E FINS.

**Artigo 1º.-** Ao abeiro do disposto na Lei de organización e control das emisoras municipais e na Lei reguladora das bases do réxime local, o control e xestión da Emisora Municipal de Radio Val do Dubra, correrá por conta da propia entidade local; quen, no xeito de fomentar a participación veciñal, procederá á constitución do Consello da Emisora Municipal de Val do Dubra, como órgano consultivo ó que se lle atribúen as funcións e competencias recollidas expresamente neste regulamento.

**Artigo 2º.-** A finalidade principal do Consello consistirá na elaboración dos criterios e normas de actuación da emisora, e na vixilancia e cumprimento destes. Velará polo mantemento da emisora, como medio de comunicación aberto a toda a poboación e á participación veciñal.

**Artigo 3º.-** Para o cumprimento das súas fins, correspóndelle ó Consello:

- A dirección e goberno da emisora municipal.
- A supervisión e aprobación dos plans de actuación da emisora.
- A promoción, xestión e aprobación das melloras técnicas e de obras, que poidan resultar beneficiosas para o mellor funcionamento da emisora.
- Coordinar as relacións entre a emisora e as institucións públicas e privadas.
- Propoñer ó Concello Pleno a forma de xestión deste servizo.
- Propoñer, así mesmo, ó Concello Pleno aquelas melloras técnicas e as modificacións do servizo, relacionadas coas fins do Consello.

## TITULO II. ORGANOS DE GOBERNO.

**Artigo 4º.-** O Consello rexerese polos seguintes órganos de goberno:

- Consello de Administración.
- Consello de Emisión.

**Artigo 5º.-** O Consello de Administración, que será o órgano superior de goberno, estará formado de acordo coa composición que se relaciona seguidamente:

- a) Presidente: O alcalde do Concello ou concelleiro no que delegue.
- b) Os concelleiros designados por cada un dos grupos municipais, segundo a súa representación no Concello Pleno e no número que seguidamente se relaciona:

De un a tres concelleiros: 1 representante.

De tres a seis concelleiros: 2 representantes.

A partir de seis concelleiros: 3 representantes.

- c) Dous representantes das diversas asociacións culturais, deportivas, xuvenís, veciñais, legalmente constituídas, con rexistro no Concello. A elección axeitarase ós termos establecidos no artigo 6 do presente regulamento.

- d) Un representante do deporte municipal, designado polo concelleiro con delegación ó seu favor na área de deportes.

- e) O director da Emisora Municipal de Radio.

- f) O secretario do Consello, nos termos establecidos no artigo 18.

**Artigo 6º.-** Os representantes das asociacións serán elixidos por elas mesmas, de entre os candidatos que cada unha presente, podendo delegar a súa representación nalgunha persoa vencellada dalgún xeito coa Emisora Municipal o co campo do Radiofonismo.

O mandato dos representantes elixidos estará referido ata cada renovación da Corporación Municipal.

O representante poderá cesar a petición propia, ou ó serlle retirada a confianza da asociación que o nomeou, ou ó causar baixa como membro da dita asociación.

No caso de cesamento dun representante, calquera que fose o motivo deste, estaremos ó disposto nos parágrafos 1º e 2º deste artigo.

Calquera outro cambio que se produza no transcurso do mandato dos representantes das entidades veciñais, haberá que comunicalo por escrito ó Presidente do Consello de Administración.

**Artigo 7º.-** Corresponde ó Consello de Administración da emisora, como órgano supremo de goberno, as seguintes funcións:

- Someter ó Pleno do Concello a modificación deste regulamento.
- Proponer ó Pleno do Concello a modificación do cadro de persoal.
- Aprobar as propostas de programación.
- Informar o balance económico da emisora.
- Cantas funcións acordes coas fins regulamentarias sexan precisas.

**Artigo 8º.-** O Consello de Emisión estará constituído polo cadro de persoal da emisora, e terá as seguintes funcións:

- Elaborar propostas de programación.
- Velar por unha programación de calidade.
- Asesorar ó director en tódalas cuestións relativas á programación e funcionamento ordinario da emisora.
- Supervisar a contratación de espazos publicitarios, así como a súa programación.

**Artigo 9º.-** Corresponderá ó Presidente:

- Ostentar a representatividade do Consello.
- Convocar, presidir, suspender e levantar as reunións do Consello de Administración.
- A superior dirección da emisora.
- Informar os pagamentos, de acordo coas normas de execución do orzamento municipal.
- Resolver os asuntos de competencia do Consello non encomendados expresamente ó Consello de Administración.

**Artigo 10º.-** Serán funcións do Director:

- Preparar e executar a programación da emisora, previa consulta ó Consello de Emisión e a súa aprobación polo Consello de Administración.
- Supervisar e coordinar a programación.
- Administrar a emisora e velar polo seu bo funcionamento e conservación.

- Xestionar o orzamento e controlar o estado de gastos e ingresos da emisora.
- Executar os acordos que lle sexan encomendados polo Consello de Administración e polo Presidente.
- Exercer a responsabilidade directa sobre o persoal que preste servizos na Emisora.
- Preparar a memoria e estado das contas anuais para a súa aprobación polo Consello de Administración.
- Distintas funcións que o Consello de Administración ou o Presidente queira encomendarlle.

**Artigo 11º.-** Sen prexuízo das funcións atribuídas ós diferentes órganos do Consello, corresponderá en todo caso ó Consello Pleno:

- A interpretación, modificación ou extinción do presente regulamento.
- A determinación do orzamento anual da Emisora.
- A aprobación do cadro de persoal, no seu caso, e na forma de xestión da emisora.
- As atribucións derivadas do presente regulamento e das leis xerais.

### TITULO III. REXIME DE SESIONS.

**Artigo 12º.-** O Consello de Administración reunirse unha vez cada trimestre. O Consello de Emisión celebrará reunións unha vez cada dous meses.

**Artigo 13º.-** Non obstante o disposto, cando a importancia ou urxencia dos temas así o recomende, ou cando o soliciten a metade dos membros do Consello de Administración, este poderase reunir en sesións extraordinarias.

**Artigo 14º.-** A convocatoria de sesións terá que notificarse con corenta e oito horas de antelación, acompañando á Orde do Día, firmada polo Presidente.

**Artigo 15º.-** As reunións do Consello de Administración entenderanse validamente constituídas cando asistan o Presidente, o Secretario (ou quen por delegación os substitúan), coa asistencia: en primeira convocatoria, da metade máis un dos membros, e en segunda convocatoria, (senalada media hora máis tarde que a primeira), de alomenos tres dos seus membros.

**Artigo 16º.-** Os acordos son válidos cando se adopten co pronunciamento favorable da maioría dos asistentes.

**Artigo 17º.-** Causarán baixa como membros do Consello aqueles que falten inxustificadamente a tres reunións seguidas, convocadas nos termos que se establecen neste Regulamento. A baixa dun membro do Consello comunicárase ó ente que o propuxo para que proceda á súa substitución nos termos regulados no presente regulamento. De non proceder a substitución solicitada, a entidade proponente quedará sen representante no Consello.

**Artigo 18º.-** Exercerá a Secretaría do Consello un traballador dos servizos administrativos do Concello, designado ó efecto polo Pleno do Concello.

O Secretario terá voz, aínda que non voto, e levantarase acta de todas as sesións que quedarán debidamente encadernadas co obxecto de formar os libros correspondentes; quedando autorizadas coas firmas do Presidente e Secretario.

#### TITULO IV. REXIME ECONOMICO.

**Artigo 19º.-** Os recursos económicos cos que conta a emisora serán os procedentes de:

a) A consignación orzamentaria recollida no orzamento municipal de gastos de cada exercicio económico.

b) A concesión das subvencións que sexan solicitadas ós organismos competentes.

c) Os ingresos que se perciban en concepto de publicidade, previstos para o efecto na Ordenanza reguladora do prezo público por publicidade na Emisora Municipal de Radio.

**Artigo 20º.-** Nos dous primeiros meses de cada ano o Consello de Emisión, na reunión ordinaria que se convocará -entre outros asuntos, para esta finalidade- elaborará a memoria e o balance económico do exercicio anterior.

#### DISPOSICIONS ADICIONAIS.

**Primeira.-** Previsto no artigo 60 nº 2 da Lei Orgánica 5/1985, do 19 de xuño, do réxime electoral xeral, que -durante as campañas electorais- os partidos, federacións, coalicións e agrupacións que concorran ás eleccións teñen dereito a espazos gratuítos de propaganda, nas emisoras municipais de titularidade pública; concrétase que a distribución destes espazos gratuítos de propaganda electoral efectuarase polo Consello de Administración, de conformidade coas previsións contidas na citada Lei Orgánica 5/1985 e tendo en conta as posibles directrices que poida sinalar para o efecto a Xunta Electoral competente.

**Segunda.-** Facúltase á Alcaldía para ditar cantas disposicións considere necesarias para a correcta aplicación do disposto neste regulamento.

#### DISPOSICION FINAL.

O presente regulamento entrará en vigor unha vez sexa publicado no Boletín Oficial da Provincia e transcorra o prazo de quince días hábiles, ó que se refire o artigo 70 nº 2, en relación co artigo 65 nº 2 da Lei 7/1985, do 2 de abril, reguladora das bases do réxime local, e comezará a aplicarse a partir do día seguinte, permanecendo en vigor ata a súa modificación ou derrogación expresa.